

Euskalkom: euskarazko prentsa aztergai

Sektorearen diagnostia barrutik egitea dute helburu jardunaldi hauek

Euskarazko prentsaren inguruko gogoeta egitea dute helburu maiatzaren 31n eta ekainaren 1ean Donostiako Miramar jauregian egingo diren 'Euskalkom prentsa jardunaldiak'. Euskarazko prentsaren agenteen arteko elkarlana eta artikulazioa bultzatu nahi du ekimen honek.

Mikel Arrieta / Donostia

EUSKARAZKO prentsan lanean ari direnei, sektorearen egoeraz kezkatuta daudenei, unibertsitateko irakasle eta ikasleei daude zuzenduta maiatzaren 31n eta ekainaren 1ean Donostiako Miramar jauregian egingo diren Euskalkom prentsa jardunaldiak.

Jardunaldiek hiru helburu nagusi dituzte: 1.— Euskarazko prentsaren errealitatearen ikuspegi orokor bat izatea eta sektorearen diagnostia barrutik egitea. 2.— Euskarazko prentsaren agenteen arteko elkarlan eta artikulazioan aurrera egitea, topagune bat sortzea. 3.— Landu beharreko aro eta aukera gehiago sortzea.

Gogoeta eta truke maila • Euskarazko prentsaren baitan lanean diharduen EGUNKARIA, Argia, Jakin, Elhuyar eta Arrasate Presseko jendeak jarri du martxan ekimen hau: «Azken urteetan komunikabideen alorrean eta bereziki euskarazko prentsaren esparruan gogoeta eta truke mailan ezer gutxi egin dela-eta oso onuragarria izan daitekeela iritzita,

premia horri erantzuteko zerbait egiteko asmoz bildu ginen alor honetan dihardugun hainbat lagun».

Iñaki Uri, Joan Mari Torreal-dai, Beñardo Kortabarria, Inaki Irazabalbeitia, Imanol Murua, Martxelo Otamendi, Luis Fernandez, Jon Sarasua eta Mikel Elortzak osatzen dute batzorde antolatzailea. Hauek prestatu duten txostenak dioenez «euskarazko prentsaren eremua gogoeta premian dago. Lanean dihardugu hainbat lagunek eta gauzak egiten dira, baina apenas dagoen horren inguruko hausnarketa eta topagunerik».

Beste sektoreek bezala euskarazko prentsak arazoak ditu antolatzaileen ustez. Nolanahi ere, «uste dugu halako irudi faltsua zabaldu dela gizartean, eta ematen duela gauzak ondo eta aurrera doazela. Produktu asko daude, produktuek aurrera egiten dute, baina mamia ez da askotan azalak iradoki dezakeen bezain sendoa».

Sektorean lanean diharduten artean, «komunikazio falta» sumatu dute antolatzaileek: «Ez dago komunikaziorik geure ar-

JARDUNALDIETAKO GAITEGIA

✕ Maiatzak 31, ostirala

09.30	Harrera
10.00	Hasiera ekitaldia
10.15	'Sektorearen diagnostikoa', Jon Sarasua
11.15	'Merkatuaren azterketa', Kike Amonarriz eta Jose Mari Sors
12.00	Atsedena
12.30	'Zabalkundea-Sustapena', Iñaki Uri
13.30	Bazkaria
16.00	Mahaingurua: 'Administrazioen politikaren azterketa'
17.30	Atsedena
17.45	'Informazio politikaren jorraketa konparatiboa', Iñaki Zabaleta
18.30	'Euskarazko kazetariaren profila', Luis Fernandez

✕ Ekainak 1, larunbata

10.00	'Desafio berriak', Pello Zubiria, Josu Landa eta Jexus Mari Zalakain
11.30	'Bi begiratu euskarazko kazetari hizkerari', Jon Sarasua
12.00	Mahaingurua: 'Zer gara prentsa erdaldunarentzat?'
13.30	Bazkaria
16.00	'Legezko babesik ba ote?', Iñigo Urrutia
17.00	Mahaingurua: 'Elkarlanerako aukerak'
19.00	Ondorioak

tean. Mordoska bat gara, baina ez dugu gune komun bat egituratu ahal izan. Nor bere kasa dabil, eta truke eta elkarlanak eman litzatekeen abantailak ezin ditugu gauzatu». Komunikazio hori ezinbestekoa da: «Konbentzitura gaude gure esparruan pentsamenduen trukea eta sek-

torearen garapena ez zaigula kanpotik etorriko. Guri dagokigu lan hori, sektorea osatu eta egiten dugunoi».

Jardunaldi hauek lehen urratsa besterik ez dira antolatzaileen ustez. «Ez genuke nahi jardunaldi hauek egin eta horretan geratzea». X

IKAk Nafarroako Jauregia inguratu egin du Gobernuak helduen euskalduntzeari arreta handiagoa jar diezaion

■ Administrazioari heldu den asteen beste bilera bat egiteko eskatu diote euskaltzale nafarrok

Juan Kruz Lakasta / Iruñea

IKAko irakasleek eta ikasleek Diputazioa inguratu zuten atzo pankarta batekin Nafarroako Gobernuari «helduen euskalduntzeari eta alfabetatzeari behar duen arreta jarri eta laguntza eman diezaion eskatzeko». Gobernua IKAekin elkarriketatzaren ari da, baina euskaltzaleon irudikoz Administrazioaren ordezkariak ez dira horri arreta handirik eskaintzen ari.

AEK-k, hainbat arrazoi direla kasua, joan den maiatzaren 3an Administrazioarekiko elkarriketaren prozesua amaitutzat ematea erabaki zuen. IKAk, berriz, itxaropen gutxiarekin izan bazen ere, aurrera segitzea erabaki zuen. Gauzak horrela, hurrengo asteen biltzeko eskatu zioten Gobernuari, eta IKAko kideak hilaren 9an Gobernuko ordezkariarekin elkartu ziren.

Hiruko Gobernuak Angel Urtasun Hezkuntza zuzendari nagusia eta Juan Jose Ekisoain Euskara Zerbitzuko zuzendaria bidali zituen bilera horretara. Bilerako gai zerrenda IKAk proposatutakoa izan zen. Lehenik eta behin Administrazioak IKAr zor dion 1995. urteko diru laguntza izan zuten mintzagai. Horren gibeletik, aurten lagun-



IKAkoek Nafarroako Jauregia inguratu zuten atzo.

JOXE

tzak jaso ahal izateko bete beharko dituzten baldintzak aztertu zituzten. Gobernuko ordezkariak proposatu zuten ikasle bakoitzak jasotzen dituen klase orduen arabera ordaintzea eta taldeak gutxienez 10 pertsonakoak izatea. IKAkoek, jakina, kontra egin zieten. Halaber, euskaltzaleak aurtengo ikasturterako diru laguntza zenbatekoa

izan den negoziatzaren saiatu ziren.

Horrelako arazo zehatzez gain, IKAko ordezkariak Gobernuarekin euskalduntzeaz oró har hitz egin nahi zutela esan zieten Urtasuni eta Ekisoaini, eta Gobernuak horretarako benetako ordezkariak izenda ditzala exijitu zuten. Ez ziren IKAkoak bileratik oso kontent atera, baina hala ere

heldu den asterako beste bilera bat egiteko eskatu dute.

Bestalde, apirilaren 30ean Gobernua osatzen duten hiru alderdiei elkarriketaren prozesuarekiko euren jarrera argitzeko eskatu zien IKAk egoitzaz egoitza protesta eginez. CDNk erantzun du jada, EAK hila amaitu aurretik egingen duela iragarri du eta PSNk ez du deus esan. X

EHE: «PPk eta UAK Cuerdak baino jarrera hobea dute ordenantzei dagokienez»

■ Manifestaziora deitu du euskararen arautegi «demokratiko, zehatz eta benetakoa» eskatzeko

Luis Karlos Garcia / Gasteiz

PP eta UA alderdiek Jose Angel Cuerda alkateak (EAJ) baino jarrera hobea agertu dute euskararen ordenantzen inguruan, Euskal Herrian Euskaraz (EHE) taldearen ustetan. Izan ere, EHEko bozeramaileen arabera, PPk eta UAk parte hartu dute Euskaltzaleon Elkarguneak aurkeztu proposamenaren eztabaidan eta EA, IU, HB, CCOO, ELA, LAB, ESK eta Udaleko Langileen Batzordeak onartu egin dute, baina alkate gasteiztarrek ez du aintzat hartu nahi izan ere. Gauzak horrela, EHEren iritziz, iaz euskararen inkesta zela-eta «alderdi espainolistek» Arabako Batzar Nagusietan egindako lanari eutsi dio orain Cuerdak, «eta hori ezin da onartu».

Euskaltzaleon Elkarguneak euskararen arautegirako proposamena aurkeztu zuen, Cuerdak berea kaleratu eta egun gutxi batzuetara. Hemendik hilabetera udal taldeetako bozeramaileen bilerak gaiari heldu, eta, jasotako alegazioak kontuan hartuta, ekarriak bilduko dituen testua bilkurara bidali beharko du. Hala ere, euskaltzaleek uste dute testua bere horretan utziko duela gobernu taldeak, eta, beraz, zenbait mobilizazio antolatu dituzte.

Datorren larunbat iluntzean manifestazioa egingo da, Cuerdarekin atzerapausoak besterik ez eta Euskarak benetako ordenantzak behar ditu leloekin. X



BERGARAKO UDALA

IRAGARKIA

Bergarako Udalak aldi baterako Kanposanturako Pioi bat kontratatuko du.

Baldintzak

Eskola Ziurtagiriaren jabea izatea.

Instantziak aurkezteko epea 1996ko maiatzaren 31ko 13.30etan bukatzen da.

Baseak eta informazio gehigarria Idazkaritzako bulegoetan.

Bergaran, 1996ko maiatzaren 21a.
ALKATEAK